

Imarsiornerup isumannaatsuunissaa pillugu inatsisit allannguutaasa Kalaallit Nunaannut atuutilersinnerinut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffigisassaattut siunnersuut.
(Ineqarnermut, Attaveqarnermut Angallanermullu Naalakkersuisoq)

Akissuteqaat
Aappasaanneerreqarnera

Naalakkersuisut sinnerlugit Sanaartornermut Avatangiisinullu Ataatsimiititaliaq aalajangiiffigisassatut siunnersuummik suliaqarnermini pitsaasumik peqqissaarussillunilu sulisimaneranut qutsavigaara.

Ataatsimiititaliap ataatsimut isigalugu peqqussut Kalaallit Nunaata eqqaani imartani imarsiornerup isumannaatsuunissaanik pitsanngorsaanertut isigigaa, Naalakkersuisut naammagisimaarlugu maluginiarpaat.

Ataatsimiititaliap isumaliutissiisutaani inassutigineqarpoq, § 29a, imm. 6, oqaaseqatigiit siulliit peqqussummut ilanngunneqarnissaa kissaatigineqanngitsoq, Namminersorlutik Oqartussat peqqussummut oqaaseqaammuni allassagaa. Taanna peerneqarpat promillimut killissarititaasup ilaasunut atuunnissaannut maleruagassanik allaffissornikkut aalajangersaasoqarsinnaajunnaassaaq. Kingusinnerusukkut maleruagassanik taamaattunik atuutsitsisoqalernissaa Namminersorlutik Oqartussanit kissaatigineqarpat, tamanna nutaamik peqqussusiornikkut pisinnaavoq.

Kisiannili Namminersorlutik Oqartussat oqaaseqaammuni peqqussummi § 29a, imm. 6, oqaaseqatigiit siulliit peerneqarnissaat qinnutigisariaqaraat pillugu ataatsimiititaliaq Naalakkersuisut isumaqatiginngilaat.

Kalaallit Nunaata imartaani angalanermut atatillugu imigassartorsimanermut maleruagassiuussisinnanermut tunngatillugu, inatsisitigut tunngavissanik atituunik pilersitsisoqarnissaa Naalakkersuisut pingaartippaat.

Maannakkorpiaq maleruagassanik, umiarsuarni ilaasartaatini ilaasunut tunngasunik atuutsitsisoqalernissaa Naalakkersuisut siunertarinngilaat. Aallaqqaammut taamaallaat maleruagassat allanngortinneqarnissaat, taamaalillunilu sunngiffimmi angallatit motoorinik ingerlatillit tamarmik promillimut killissarititaasumut maleruagassani pineqartunut ilaatinneqalernissat Naalakkersuisut sulissutiginiarpaat.

Maleruagassat allanngortinnerini imarsiornerup isumannaatsuunissaata pitsaanerulertinneqarnissaa anguniarneqarpoq. Taamaattumik maleruagassanut allannguutissatut pilersaarutigineqartut kissaatigisamik sunnuteqanngitsut paasinarsissappat, imaatigut angalanermi promillimut killissarititaasooq pillugu maleruagassani inuit pineqartut amerlinissaannut Namminersorlutik Oqartussat periarfissaqarnissaat pingaaruteqarpoq.

Tassani assersuutigalugu angallatit minnerit pineqarsinnaapput, taakkunani ilaasut inuttallu, soorlu Sarfaq Ittuk-mut sanilliulluni immikkoortikkuminaannerusinnaammata.

Tassalu maleruagassanik, umiarsuarnut sinersorlutik takornariatitsisartunut imaluunniit umiarsuarnut sinersortaatinut ilaasut imigassartornissaannut akornusiisunik atuutsitsisoqalissanngilaq. Kisiannili maleruagassat, promillimut killissarititaasumut maleruagassanut inuit pineqartunut ilaatinneqartut amerlisinnaaneritut tunngaviliisut attanneqaannarnissaat pingaaruteqarpoq.

Tassalu Naalackersuisut isumaqarput, isumannaallisaaneq inuit imigassartornissamut periarfissaqartinneqarnerinit salliutinneqartariaqartoq.

Taamatut oqaaseqarlunga immikkoortoq Inatsisartuni kajumittumik suliassanngorlugu tunniuppara.